

4. Cor. 12.

Das vorleyhe mir der gütige got Amen/Dan ich weys das
keyn grösser tugent/auff erden vnd yn hymeln/ist/dan gelassen-
heyt/ Sol eyner alle seyn gut/eher/freund/leyß/vñ seel vorlassen/
Wan ich auch/ym mittel/der flammē brennet/vnd het nit ge-
lassenheyt/so wer mir meyn leyden vndinlich. Das ist wan
ich gott/nit liebet/vnd in yhn getrawhen/trost/glauben vnd
hoffnung setzet/so wer ich/wie eyn glocke/die erschellet.

¶ Christus spricht/Keyner mag grösser lieb habenn/dan das er
seyn leben für seyn freund setze.

Ich hab freund in Christo (die das edel Blut Christi gemacht)
von der selbe wegen(auff das sie nit in gottis wort abnehmen)
soll ich leyden/Keyn übell/fero: oder todt/Kan an gotliche lieb
fruchtbarlich geschehen. Vrsach welcher gott recht liebet/der
suchet yn leyden vnd wercken/yn süßigkeit vnd bitterkeit nicht
anders/dan gottis eher/Welcher aber sich selber in seyn augen
stellet/vnd meynet seyn aygen glouen/der liebet sich/vñ nit got/
vnd dienet gott nicht mit keynem leyden oder außwircken.

4. Cor.

Derhalben spricht Paulus. Wan ich ein glauben/der wunder-
zeychen/hette/das sich die berg/auff meyn gebot/yn das Meer
tragen/vñ het nit gotliche liebe/vñ meyners haß/so wer mir/der
glaubē vnnütze. Derhalben Christus vns in hohen vleys vor-
mant/sprechende. ¶ Welcher nach mir wil folgen/der sol sich
selber verleugnen/vnd trag seyn Creutz teglich vnd folge mir.

Lu. 9.

Gelassenheit
yhn leyden
vnd vuerkē

¶ Ist es nit eyn schmerzlich ding/das ich mich keynes ley-
dens darff annemen/als hett ich/von mir selber was außgea-
richt/Wil ich von gottis wegen etwas leyden oder ein Creutz
ertragen/so muß ich zuvor mich verleuchnen/vnd mich selber
vorlassen.

¶ Ich muß meynen willen/gantz vnd gar/ynn den got-
lichen willen versencken/vnd aygen willen in allen dingen er-
diencken/Also muß ich wollen/wie gott wil. Derhalben hat er
allen wercken vnd leyden vñ den personē selbst/die gelassenheyt
fürgesetzt/spechēde. ¶ Welcher nach mir kumen wil/vñ nach-
folgen/der verleugne sich selber. Sich vnd hör wie die werck vñ
vnserm aygen willen abfallen. Wiltu von dem leyden hören/so
merck was er von dem Creutz redt.

Gelassenheit
der person.